

四庫全書

集部

欽定四庫全書

聖祖仁皇帝御製文第二集卷四十目錄

雜著

庭訓

讀周禮書後

書戰國策後

書性理奧後

跋虞世南墨蹟後

跋顏真卿墨蹟後

跋蘇軾墨蹟後

跋黃庭堅墨蹟後

跋米芾墨蹟後

跋朱子墨蹟後

跋趙孟頫墨蹟後

跋董其昌墨蹟後

連珠

欽定四庫全書

聖祖仁皇帝御製文第二集卷四十

雜著

庭訓

朕自幼齡學步能言時即奉

聖祖母慈訓凡飲食動履言語皆有矩度雖平居獨處亦教以罔敢越軼少不然即加督過賴是以克有成八齡纘承大統

聖祖母作書訓誡冲子曰自古稱為君難蒼生至衆天子以一身君臨其上生養撫育無不引領而望必深思得衆則得國之道使四海之內咸登康阜綿歷數於無疆惟休汝尚其寬裕慈仁溫良恭敬慎乃威儀謹爾出話夙夜恪勤以祇承乃

祖考遺緒俾予亦無疚於厥心朕仰戴斯言大懼弗克遵茲丕訓惟曰庶其自強不息以日新厥德益思學問者百事根本不能學問則漸即於非幾以故自少讀書

深見夫為學之要在乎窮理致知天德王道本末該貫
存心養性非此無以立體齊治均平非此無以達用於
是孜孜焉日有程課樂此忘疲雖帝王之學不專事纂
組章句顧由博而約往詰遺訓惟能網羅記載搜討藝
文斯足增長見聞克益神智朕機務之暇講肄諸經叅
稽易學於太極西銘之義河圖洛書之旨往往潛心玩
味以次歷觀史乘考鏡得失旁及古文詩賦諸子百家
說命云念終始典於學周頌言學有緝熙於光明朕所

以朝斯夕斯至今弗輟者也書亦六藝之一朕每念心
正筆正之說作字自來未敢輕易喜臨摹古法書考其
源委又禮記射義稱事之盡禮樂而可數為以立德立
行者莫若射故聖王務焉易大傳言弧矢之利以威天
下朕自少習射亦如讀書作字之日有課程久之心手
相得輒命中用率虎賁羽林以時試肄念

祖宗以來以武功定禔亂文德致太平豈宜一日不事
講習朕凡此既以自勉還用督率汝曹周書曰不學牆

面蒞事惟煩孔子曰少成若天性習貫如自然蓋蒙以養正盛年力學如朝日舒光元良國之根本支庶國之藩附朕深惟

列后付託之重諭教宜早弗敢辭勞未明而興身親督課東宮及諸子以次上殿背誦經書至於日昃還令習字習射覆講猶至宵分自首春以及歲晚無有曠日每思進脩之益必提撕警誡斯領受親切汝曹生長深宮未離阿保薰陶涵養正在此時尚其愛日惜陰黽勉勿

急故復諄諄欲令汝曹皆知吾心也木受繩則直金就礪則利窮理格物多識前言往行是惟作聖之功汝曹今日為子弟他日為人父兄取資匪遠當思吾言

讀周禮書後

周禮一書先儒信者半疑者半其疑者曰周衰諸侯滅去其籍自孔子時已不具至孟子時尤殘缺莫考故曰其詳不可得而聞夫孟子當秦未燔書之前已不見周禮漢世焉得而有之且其大者莫如建官封建井田諸

事然東西都為地甚狹何得王畿道里四方各距千里
宮府內外官制何得比夏商遂益萬倍五等封地何所
并徙而能斥大九州溝洫井田鄉遂公邑何以利害同
而法制異其為後儒偽造之書而非周公之舊也其信
者曰周禮寓兵農則以井田定惟正則以什一教萬民
則以鄉遂養士秀則以學校治天下則以封建其要有
六典八法八則九柄九貢九式之序其次有祭祀朝覲
冠昏喪紀師田行役之條無不詳備周密雖其間細瑣

職事或出後人附會然大體要所在非聖人創建不能也朕謂二說皆儒者讀書考究之言未可偏廢若夫帝王法古致治總在師其意而不泥其迹孔子曰殷因於夏禮所損益可知也周因於殷禮所損益可知也夫損益者因時制宜之謂程顥曰有闕睢麟趾之意然後可行周官之法度朱熹曰周禮是聖人姑為一代之法爾到可用處聖人須別有權變之道誠哉斯言夫泥其說而用之王莽王安石遂致流毒天下若師其忠厚之意

以措諸紀綱法制之中則何遂不可比隆成周朕故以孔子及程朱之言為讀周禮法

書戰國策後

此書上繼春秋下至秦漢之間二百四十五年行事皆備載於其中朱熹曰有治世之文有衰世之文有亂世之文六經治世之文也國語衰世之文也國策亂世之文也然有英偉氣非衰世國語之比此專以文論耳若其書之大指皆當時游士挾其詐謀窺其時勢之所必

出中其時君之所必從或迎而導之或逆而折之誘之以利怵之以害縱橫開闔皆非仁義道德之言也間或有譎而合於正者十不得二三耳此蘇秦商鞅孫臏吳起李斯之徒所以卒殞其身而禍人家國惜當時諸侯及秦皆溺於若輩之說而迄無有早悟者夫六經四子之書其理甚近其說甚平聽之若迂闊而寡效然考之無偽用之無疵可以定危亂可以躋治平故善理天下者終不肯以此易彼也

書性理奧後

聖人之道始於明明德極於位天地育萬物造端於宥
密而彌綸於兩間百姓昭明協和萬邦飛潛動植咸若
其天者非從外求也盡性而已中庸曰惟天下至誠為
能盡其性能盡其性則能盡人物之性能盡人物之性
則可以贊天地之化育益人物之性即天命之同然與
天地參乃性分之能事故曰民吾同胞物吾與也然則
天地萬物豈在性外哉性理一書闡於周程邵張集成

於朱子孔孟之旨昭然若揭日月於中天其遞相發明者百有餘家而後斯道大著為書可謂博矣是編節錄精義由博而約誠能反覆研極可以見性體之大而識盡性參贊為一理古昔聖賢心傳之妙由諸子之說進求之因流溯源得其意而致力焉修齊治平亦無餘事矣

跋虞世南墨蹟後

虞世南仕貞觀朝為太宗所賞稱其五絕一曰德行二

曰忠直三曰博學四曰文詞五曰書翰今考唐史所載
世南言論行事果有卓然足多者其書法少師智永專
心不懈晚年遂造羲之之室當時與歐陽詢竝以書名
議者謂歐虞智均力敵然虞則内含剛柔歐則外露筋
骨君子藏器以虞為優誠篤論矣但世南墨蹟稀如麟
鳳黃庭堅云孔廟虞書貞觀刻千兩黃金那購得想當
時民間鮮有藏蹟故云然也朕萬幾餘暇雅好臨池宮
中舊藏虞書時出披覽摹倣其意輒有神會爰濡筆而

識其後以示珍重云

跋顏真卿墨蹟後

史稱顏真卿立朝正色剛而有禮非公言直道不萌於心天下不以姓名稱咸曰魯公而獨為權奸盧杞所忌遣諭李希烈竟被賊害觀其赴火罵逆何其烈也生平善正草書宋祁稱其筆力遒婉今披閱遺蹟凝重沉鬱奇正相生如錐畫沙直透紙背覺忠義之氣猶勃勃楮墨間朕重其人益愛其書不啻逾於球璧矣

跋蘇軾墨蹟後

論者謂宋四家書皆從顏魯公入然亦以其天分高出
一時神明變化於古人耳實不盡拘於成法也觀蘇軾
前後論書詩可知矣軾題孫莘老墨妙亭詩云顏公變
法出新意細筋入骨如秋鷹題石蒼舒醉墨堂詩云我
書意造本無法點畫信手煩推求故其平生所書以跌
蕩取勢以雄秀取態殆變化於古而不專主於顏者世
又謂軾書亦學徐浩今浩書刻帖具在亦不相似也郭

界云東坡晚歲自海外挾大海風濤之氣作字如古槎
怪石如怒龍噴浪今觀其真蹟信然豈區區成法之是
拘耶

跋黃庭堅墨蹟後

黃庭堅秦觀晁補之張耒輩游於蘇軾之門當時稱蘇
門四學士而庭堅為尤著時人至以配軾稱蘇黃其文
章學問固卓犖不羣而行草書亦自成一家元祐中嘗
作草書於僧舍軾賞歎再四錢勰從傍曰君見自敘真

蹟當更有得後謫黔獲見之遂深契藏真之妙嘗自云
元祐間筆意癡鈍用筆多不到晚入峽見長年盪漿乃
悟筆法此其草書之所以異也至所作行書剝去姿媚
獨存風骨直欲與蘇軾分道揚鑣不肯俯循其轍間或
雄姿猛氣逸出常度亦無傷其為神駿故朕恒玩之

跋米芾墨蹟後

米芾書在宋四家中特為雄秀史稱其沉著飛翥得王
獻之筆意或云芾始學顏書已而宗李邕又棄而學沈

傳師數數改業遂成名家今世沈傳師書絕少其與米之優劣無可考要以得法於獻之為確論也朱熹曰米老理會得字故所論皆實是朱子蓋亦心折之其為書豪邁自喜縱橫在手肥瘦巧拙變動不拘出神入化莫可端倪洵堪與晉唐諸家爭衡昔人謂右軍如龍北海如象然則芾其在龍象之間歟

跋朱子墨蹟後

嘗觀朱子論書一則有曰字被蘇黃寫壞近見蔡君謨

一帖字字有法度如端人正士方是字考亭固大儒其
平日於柳公權心正筆正及程子寫字主敬之說蓋必
有取也然觀其墨蹟亦嘗間有蘇黃筆意考亭之論或
出於其門人所附會未可知爾蘇黃書法原從顏柳得
來考亭書沉著古勁當亦本於顏柳故時有不期而合
之處耶

跋趙孟頫墨蹟後

宋濂作趙孟頫傳云篆籀分隸真行草書無不冠絕古

今鮮于樞云予昂諸書皆為當代第一而小楷又為諸書第一胡長孺云上下五百年縱橫一萬里其稱賞之者至矣蓋書自宋四家盡變唐法而蘭亭玉潤諸帖之意寢遠孟頫起而矯之全用二王矩矱心慕手追神契無迹故一時矜為度越前代然相傳其嘗作米書輒自棄去以為不及良由米芾以天勝孟頫以人勝故爾第天分得之性生不可勉強人功盡則天自見右軍學書池水盡墨如此安得不神朕於古人諸法書無不展玩

臨摹而於米趙墨蹟尤珍愛不忍釋手倣成卷軸動至盈千用冀天人交盡得古人微意而自忘其握管濡翰之勞也

跋董其昌墨蹟後

華亭董其昌書法天姿迴異其高秀圓潤之致流行於楮墨間非諸家所能及也每於若不經意處丰神獨絕如微雲卷舒清風飄拂尤得天然之趣嘗觀其結構字體皆原於晉人蓋其生平多臨摹閣帖於蘭亭聖教序

能得其運腕之法而轉筆處古勁藏鋒似拙實巧書家
所謂古釵脚殆謂是耶顏真卿蘇軾米芾以雄奇峭拔
擅能而根柢則皆出於晉人趙孟頫尤規模二王其昌
淵源合一故摹諸子輒得其意而秀潤之氣獨時見本
色草書亦縱橫排宕有古法朕甚心賞其用墨之妙濃
淡相間更為夏絕臨摹最多每謂天姿與功力俱優致
此良不易也因臨池之暇遂書此於簡末

連珠

蓋聞知禮樂之情者能作識禮樂之文者能述疇非聖而克開疇非明而弗失是以黃軒肇則道協陰陽姬旦承謨制叅忠質

蓋聞文治深則武功大德施博則威制隆是以秦蕤詩書再世而致咸京之炬周傳官禮一戎而垂鎬室之裳蓋聞珠囊在御顓俊則興寶鑑移暉棄賢則晦是以阿衡去桀而負鼎夏道終衰尚父遇文以投竿周邦克乂蓋聞造化宰乎自然品類因夫各得青陽煦物非私亭

毒之心白露凋芳豈任虔劉之德是以九功歌於九敘
戒董蕪施五教弼夫五刑明允為則

蓋聞泰岱為五岳之宗謂其居高而不亢滄海為百川
之長謂其蕪容而有餘何則過剛則凌物至察則無徒
是以道主敬民若馭朽索之馬心存愛物寧漏吞舟之
魚

蓋聞方圓互用體有殊規小大蕪呈材非一器是故記
功忘過所以收遠馭之猷量職授能所以懋允釐之治

蓋聞陰陽寓於六位天人備乎九疇終始元貞本太和之保合剛柔正直惟皇極之懋修是故白旄既麾訪河洛而叶契韋編載絕通神明而贊幽

蓋聞治道多端農為政本厚生有術食乃民天何則非知稼穡之艱罔臻作所未盡穰蓂之力曷冀逢年是故夏禹經邦首敷土壤姬文卑服專務康田

蓋聞虛以集猷弓旌招士樂以取善鞀鐸求言惟棧樸繁則化日盛堯蕩廣則道日尊是以訪德崆峒不惜順

風之拜咨謀岳牧式宏舉佚之門

蓋聞王猷建國爰分職於作屏善政養人聿宣仁於求
牧是以布甘棠之教澤著美周詩獎渤海之循聲揚芬
漢牘

聖祖仁皇帝御製文第二集卷四十

欽定四庫全書

聖祖仁皇帝御製文第二集卷四十一目錄

祭文

躬詣

天壇祈雨祭文

天壇謝雨祭文

躬禱

天壇文

天壇祈雨祭文

祈穀壇祭文

親征噶爾丹告祭

天壇文

剿滅噶爾丹告祭

天壇文

剿滅噶爾丹告祭

歷代帝王陵寢文

剿滅噶爾丹告祭

先師孔子文

祭

禹陵文

祭明太祖文

祭西嶽華山文

重修闕里

聖廟告成遣皇子告祭文

欽定四庫全書

聖祖仁皇帝御製文第二集卷四十一

祭文

躬詣

天壇祈雨祭文

康熙二十六年

臣以眇躬仰承

天眷撫育羣黎兢兢業業惟恐隕越邇者自春徂夏雨澤愆期京輔亢暘深懷疚懼良由眇躬不德政未咸宜

大小臣工罔盡厥心惟君臣之咎於億兆何辜前者循
省已過詔告四方而靈雨尚未沾足浹旬仰望彌切焦
勞茲特潔蠲吉日率勵羣工實圖洗心齋祓將事呼籲
上帝切望

慈休謹以牲帛醴齊粢盛親行虔禱伏冀

俯鑒誠懇大沛甘霖俾兆民之咸蘇惟邦家之有慶引
領

郊壇尚祈

昭格謹

告

天壇謝雨祭文

康熙二十六年

惟

大造無私覆幬萬物顧茲億兆迭荷

生成邇者雨澤愆期恐妨穡事

臣

為民請命齋祓深宮

訓誡羣臣共加惕厲謹諏吉日虔告

郊壇乃於吉蠲之辰甘霖旋降更當步禱之夕靈澍再

敷浹旬之間四郊優渥從此三農有慶歲事可期是皆
帝載洪慈惠及黎庶眇躬何幸徼福

蒼穹被德彌深戴恩罔極謹以牲帛醴齊染盛報謝伏
冀

歆格

躬禱

天壇文

康熙二十六年

臣仰承

天祐奉事

祖母太皇太后高年荷庇藉得安康今者疾病驟作一旬以內漸覺沉篤旦夕可慮臣夙夜靡寧寢食捐廢徧問方醫虔治藥餌罔克奏効五內憂灼莫知所措竊思天心仁愛覆幬無方矧臣眇躬夙蒙慈眷憶自弱齡早失怙恃趨承

祖母膝下三十餘年鞠養教誨以至有成設無

祖母太皇太后

臣

斷不能致有今日成立罔極之恩畢

生難報直茲危殆方寸憤迷惟有潔蠲擇日謹率羣臣
呼籲

皇穹伏懇

憫念篤誠

立垂昭鑒俾沉疴迅起遐算長延若大數或窮願減臣
齡冀增

太皇太后數年之壽為此匍伏

壇下仰祈

洪祐不勝懇禱之至

天壇祈雨祭文

康熙二十八年

臣仰承

眷祐綏育黎元宵旰饒罔敢怠逸惟冀雨暘時若民
物阜成乃者仲夏已臨甘霖未沛閔茲農事怵惕靡寧
深慮渺躬涼德政治失宜在廷百職未能靖共爾位克
殫乃心致此亢暘憂及黔庶今耕夫懸耜播種後期艱
食堪虞雲霓望迫若非仰祈

穹昊何由俯慰民生用是祇肅齋居兼勵卿士實圖滌
被共竭精誠謹以牲帛醴齊粢盛虔禱

郊壇伏冀

昭鑒微衷立施解澤俾三農之普利庶億姓之咸休翹
首

鴻慈不勝顙切謹

告

祈穀壇祭文

臣續承鴻業撫育蒸黎惟貴粟重農先務是亟荷

天之眷歷紀順成率土元元久沾樂利頃者歲行在己
早暵為憂畿甸之間阻饑尤甚臣覩災謹閔此窮簷宵
旰省惟中情惶惕殫心賑救罔敢暇寧顧時閱三冬同
雲鮮應側席減膳倍篤焦勞茲者候屆上辛田功肇始
伏念

天心仁愛必軫民力艱難苟非

錫以豐穰何由共登康乂敢因祈歲展竭悃誠冀昭事

之精虔荷

穹蒼之鑒格謹率臣寮以玉帛牲醴染盛庶品恭祀

上帝仰祈

右茲將享時若雨暘用觀百穀之登溥洽三農之慶尚
饗

親征鳴爾丹告祭

天壇文

臣仰承

鴻祐臨馭兆民夙夜恪恭罔敢逸豫惟期中外乂安咸
遂生養比年以來厄魯特噶爾丹荒陬狡寇悖逆

天常肆行凶虐曾經征剿窮寇敗遁廼猶怙終不悛蔑
棄誓言侵掠喀爾喀潛伏近塞詭詐跳梁稔惡已極久
為人心所共憤自為

上蒼所不容

臣茲恭行

天罰聲罪致討遣發大兵分道並進

臣

特躬蒞邊外相

機行事用掃除頑梗之患以永綏荒徼之民擇於二月

三十日啓行伏祈

帝鑒謹

告

剿滅噶爾丹告祭

天壇文

臣祇承

景命臨御萬方惟期中外乂安咸遂生養茲以厄魯特
噶爾丹荒陬狡寇肆虐跳梁怙惡有年神人共疾

臣用

是於丙子春親統六師恭行

天討越踰瀚海掃蕩賊氛深入窮追師徒大捷於丙子
秋再履邊境經畫招徠於丁丑春復至朔方奮揚武略
逆子俘獲醜類革心允渠殄亡邊塵盡滌遐荒番部罔
不歸誠皆藉

上蒼弘祐之靈俾成絕塞永清之烈特遣專官用申禋
祀敬告成功伏惟

帝鑒尚

饗

剿滅噶爾丹告祭

歷代帝王陵寢文

自古帝王受

天景命制治綏猷必禁暴除殘以乂安黎庶緬懷往烈
道實同符朕欽承

帝祉臨御九圍茲以狡寇跳梁親征漠北蕩滌寇氛廓
清邊徼永消兵革以與普天率土樂育太和敬遣耑官

代將牲帛昭告古先

哲后虔修禋祀式彰安攘之模用展景行之志仰企

明靈俯垂

鑒饗

剿滅噶爾丹告祭

先師孔子文

朕服膺

聖訓殫究遺文凡茲六籍所垂惟以安民為要臨御以

來孜孜圖治綏乂蒸生遠邇中外視同一體乃有厄魯
特噶爾丹荒陬狡寇肆虐跳梁擾毒邊方稔惡已極朕
親統六師三臨絕塞弘彰撻伐克奏膚功逆孽就俘兇
渠殄滅遐荒番部罔不歸誠自茲永靖邊塵咸安生業
惟是

至聖先師默相啓佑特遣耑官敬申禋祀祇告成功伏
惟

昭鑒尚

饗

祭

禹陵文

惟

王精一傳心儉勤式訓道由天錫啓皇極之圖疇功在
民生定中邦之井牧四載昔勞疏鑿永賴平成九叙早
著謀謨惟歌府事行其無間德遠益新朕省方東南道
經吳越覩長江之浩渺心切沂洄瞻高巘之嵯峨企深

仰止幸矣松楸伊邇儼然律度可親特薦馨香躬修祀
事惟祈

靈爽尚克來歆

祭明太祖文

惟

帝天錫勇智奮起布衣統一寰區周詳制作鴻謨偉烈
前代莫倫朕曩歲時巡躬修醑薦景其遺轍不圉成規
茲因閱視河防省方南邁園陵如故睇松柏以興思功

德猶存稽典章而可範溯懷彌切親酌重申

靈其鑒茲尚期歆享

祭西嶽華山文

朕惟五嶽之祀載於虞書所由來遠矣稽考歷代舊章
國有慶典必舉告祭之文蓋以含靈布澤能錫福於斯
民故裡祀惟虔禮至重焉

西嶽華山之神聳峙關中照臨西土比年以來秦省左
右亢旱頻仍百姓艱食流離轉徙未有寧居田疇荒蕪

不能墾闢朕憫念焦勞罔間宵旰反覆圖維或者因朕之不德或者有司之不肖以致雨暘失節重困吾民前者蠲租發賑屢遣大臣拯民疾苦守土鉅僚亦已更置殫心竭慮以盡人事而烝民猶未臻康食朕念國家以民為本民以食為天百穀蕃滋端賴雨澤順時需足咸藉

神功用是特遣皇長子允禔虔申殷薦祇期默佑時沛甘霖俾三農常沾優渥之庥庶兆姓永享豐亨之樂錫

民嘉祉丕慰朕懷不益光歟朕之斯舉非以媚神求福也惟敬為百姓請命爰布誠悃

神其鑒之謹

告

重修闕里

聖廟告成遣皇子告祭文

朕惟道統與治統相維作君與作師並重

先師孔子德由天縱學集大成綜十聖之心傳為萬世

之師表故廟祀久遠垂於無窮朕御寓以來立綱陳紀彰教敷治咸奉

至聖為法程凡典禮追崇竭誠致敬自京師下逮郡邑辟雖泮水建廟釋奠罔不修舉况茲闕里乃聖人鍾毓之鄉車服禮器於斯歲守曩者東巡展拜之餘仰觀廟貌多歷年所漸有頽敝深厪於衷用是命官董理重加修葺棟宇維新以妥聖靈茲當告成特遣皇子允祉致祭俎豆肅陳恍乎接至聖之音容以將朕儼恪欽崇至

意陟降在茲尚祈歆饗

聖祖仁皇帝御製文第二集卷四十一

欽定四庫全書

聖祖仁皇帝御製文第二集卷四十二目錄

賦

恭祝

皇太后萬壽無疆賦

汗血馬賦

木棉賦

金蓮花賦

欽定四庫全書

卷四十二目錄

菊賦

欽定四庫全書

聖祖仁皇帝御製文第二集卷四十二

賦

恭祝

皇太后萬壽無疆賦

有序

蓋聞世運昇平內庭懋儀型之慶天心錫嘏彤管高
嫺睦之風惟度協於中和斯福昭其美備我

聖母皇太后仁慈夙秉恭儉習成濯龍明德久冠宮闈

致治宣仁胥稱堯舜茲當冬月之初正逢周甲之喜
敬泐蕪詞上介

遐壽聿抒孺慕之微忱兼採臣民之共願瞻依莫殫
忭舞惟殷謹拜手而賦曰

惟坤作則配

天行健圖錄祥呈璇衡瑞獻西池之青鳥飛來南極之
明星乍現佐治登三流歡吹萬籟筐玉帛萬國獻其球
琳夏清冬溫一心慰以至願婉姸降於華渚飛瓊舞於

綺苑祈歷算之永延湛精神而靡倦
婉盛沆瀣之漿鼎
熟胡麻之飯織壽字以成圖捧霞觴而進勸序屆初冬
花明永晝欣拜舞以爭先肅趨蹌而恐後岡陵之禱嵩
岱同巍松柏之篇椿桃並茂雲璈響徹協鸞鶴以雙清
砌草憂忘報嶺梅之先秀指海屋以籌添睇斗杓而錫
祐山若積而彌深地以增而益厚普天率土咸頌仁慈
閭苑蓬壺齊呼

聖壽若乃春秋佳勝媚景舒徐奉晨昏於軒榭親顏色

於庭帟岸柳汀花依依含笑隄鶯梁燕嘒嘒相呼於是
汎龍艦扶鳳輿或怡情於碧沼或攬勝於金鋪叙天倫
之樂事暢逍遙以共娛尊養樂愷古昔所無誠乃邁徽
猷於任姒臻至治於唐虞咏絃懿淑富有嘉祥身與心
而俱泰福因德而逾彰謹集萬方之玉帛肅百序之冠
裳翦鮫人之千錦貢織女之七襄寶座煙霏層層珠蓋
博山香遶陣陣都梁樂奏雲門之曲仙來瑤島之疆竊
欣侍奉

膝前趨迎朝暮浥霞彩於靈萱酌太和於甘露臣則稟
誨諄諄撫茲寰宇際日吉以時良樂和風而甘雨恭逢
壽域之開虔製荒蕪之句願

母壽之靡涯享鴻圖之景祚優游悅豫金石比其堅貞
綿亘扶疎梗楠同其蟠固愧莫罄於頌颺載降階而陳
賦

汗血馬賦

有序

稽古居大功者不忘艱難克巨慙者必懷天眷是以

執醜歌於常武捷伐歸於降監而易曰王用出征有
嘉折首蓋言人君恭行天罰肆討不庭軍旅所屆能
奏蕩定其績為莫可泯也朕以逆寇噶爾丹攫噬屬
國邊徼弗寧用是親秉黃鉞三統六師揚威萬里所
過焚其廬帳殲其醜類馘其妻孥散其徒黨未及二
載滅此竊窳骨骸專車懸乎藁街敢曰予一人勞哉
實天所賜爾當大師再出狡賊畜牧盡為我獲中有
良馬繫惟汗血獻至帳殿之前千官七校竦視競悅

昔漢得宛馬推本太乙作樂郊廟然不過貳師所攻
取耳未嘗自將而殄絕之也則今茲駟駿呈才允足
徵天貺而有合於詩易折首執醜之義矣萬幾餘暇
因濡翰而賦之曰

維歲在柔兆困敦薄伐至於絕幕雷霆震其聲靈箕翼
張其習霍何小醜之螳臂遇鋒車而猶攫虎旅夾以大
鑿封豕殲而染鍔同宛首之函庭覩遺孽之面縛逼穹
廬之悉焚猗善馬之就絡爾其產邁渥洼符亞玉澤俶

儻權奇沫赭汗赤氣騰千里姿雄八尺信滅沒之逸倫
軼超景之絕跡幾埋沙磧以畢生幸仰雲衢而稱德於
是寶鉸飾容金羈節步聯轡龍媒參鑣象輅競鐵駟以
凌飈環豹尾而清路凱音奏而和鳴都人見而企慕昔
帝軒膺籙阜服吉光后虞垂衣地出乘黃禹敷水土而
飛兔引御文綏江漢而朱鬣高驤璿臺驅兩龍之駕代
邸騁九逸之良此皆協治平以效瑞而非靖寇亂以寧
疆是則神驥之歸列廐絳液之灑鏤章洵足昭我武之

有赫與天眷之丕昌
顧撫茲八蠻之蹠躩
永諧萬國之樂康
將愈凜朽馭於夏訓
而遠希圖出於義皇也

木棉賦

有序

木棉之為利於人溥矣
衣被禦寒實有賴焉
夫既紡以為布復擘
以為紃卒歲之謀出
之隴畝功不在五穀
下嘗稽之載籍島夷
卉服註以為吉貝即
其種也然止以充遠
方之貢而未嘗遍植
於中土故周禮婦功
惟治蠶桑唐徵庸調
但及絲麻至木棉之
種後世

由外蕃始入於關陝閩粵今則遠邇貴賤咸資其利
而昔人篇什罕有及之者故為之賦曰

攷吉貝之佳種披丘索以窮源道伽毗而遠來由秦粵
而衍蕃倣崖州之紡織製七襄而無痕倣宋人之淋漓
比八綿而同溫先麥秋而播種齊壺棗而登原宿黃雲
於萬蕊墮白雪於千村落秋實於露晞軋機軸於星昏
煖佐耆年之帛陽回寒女之門辛卒歲之可娛乃民力
之普存若應鐘之司律正薄寒之中人月照牛衣之夜

霜侵葛屨之辰家挾千箱之續路絕百結之鶉曝茅簷
而歌愛日賽田祖而洽比鄰謝履絲之靡麗免于貉之
艱辛故夫八口之家九土之氓無沍寒之膚裂罕疾風
之條鳴時和年豐水耨火耕歲落三鍾之棉塲登百畝
之杭同彼婦子樂此太平奚羨纂組之巧與夫縞紵之
輕慨風詩之未錄省方問俗將以補幽什而續授衣之
經

金蓮花賦

侔嘉名於華頂結異質於清涼冠方貢之三品賦正色
於中央蹇芙蓉而在陸麗茵茵於崇岡顧柳池之非偶
豈蘋澗之可方煥彪炳而成文散梅檀而結燼煙橫鋒
裏之香妝沐江干之靚受範公輸之規移芳彭澤之徑
田田與芰蓋殊形矯矯並木蘭比勁若夫當融風之拂
樹值暑雨之平池面鏡潭而寫色掩玉砌以橫枝葉潤
陵晨之霧花含照夜之珠襲輕芬於衣縠映斜月於窻
帷本託根於道岸曾何畏乎泥淄爾乃草鋪微綠之區

蝶舞輕黃之翅沾芳則土脉流膏落蕊則蜜脾分饋非
桃李而成蹊與鞠衣而同製於是滴珠露以研黃挹金
房而瀉翠玉板潤而脂融松腴蒸而雲翳摘珍產於山
經表奇芳於幽閔異紅采於巖阿謝朱霞於水曲漏鐫
長樂之銅壺燈燦蓬山之銀燭卑五華之仙葩超四照
之靈木彼夫綠竹則稱君子青松以擬大夫澤荷載於
篇什猗蘭紀於史書惟斯卉之挺秀拔衆彙而標奇感
無言於空谷久掩嫫於山陂移土礎於上苑沐日月之


光曦化同被於偃草忱獲效乎傾葵

菊賦

當金飈之蕭摵正珠露之飄零睹百卉之具腓感苑枯
之遞更疇晚序而挺節矯氣化而敷榮爰有紫蒂含芳
黃華逞茂摧莒穎於春初曜丰容於霜後先梅萼而吐
芬繼蘭叢而擅秀既勁操之彌堅實寒香之可嗅爾其
密葉蒙茸繁英歷球霞蔚雲蒸煙披雨沐色徵土德之
純氣稟金行之肅舞燈影而紛披傍離根而芳馥似幽

人之相依豈世情之共逐是以丘園逸叟山澤癯儒植
而供翫擷以當蔬存真味於澹泊協潛德以敷腴亦有
餐霞御氣乘雲握符盤飴桐杞囊繫茱萸或年壽之永
延或災患之潛祛斯其著效於仙靈之錄尤不可以耳
目拘也至若賦餐英於楚客傳送酒於晉賢泛甘馨於
南郡準節令於渾天罔不貞操卓爾高韻悠然宜名流
之競羨亦譜籍之長編矧茲北闕秋深西山氣爽餘柏
葉之參差刺楓林之莽蒼蝶揚揚而媚秋雁嚙嚙而流

響寒漠漠而侵堦月溶溶而度幌爾乃橫逸態以寡儔
吐層鱗而直上種類間錯名品紛羅映小山之叢桂覆
潭水之澄波低昂兮如紫衣之垂袖璀璨兮如白貝之
編珂稟黃中之通理知中美之孔多蓋與松筠而共勁
亦視桃李而殊科彼夫揚霜傑於詩人誇日精於本草
藉滋培於寒雨綻鮮華於清曉咸以孤潔方幽人之貞
高逸擬君子之道苟其歷歲寒而長存何恨乎挺生之
不早



聖祖仁皇帝御製文第二集卷四十二

欽定四庫全書

集部

聖祖仁皇帝御製文第二集卷四十一

六

臣 永瑤恭校

侍讀臣孫球覆勘

覆校官中書臣施光輅

校對官主簿臣郭祚熾

謄錄監生臣帥應龍

欽定四庫全書

聖祖仁皇帝御製文第二集卷四十三目錄

古今體詩四十一首

季夏遊西山憶舊

詠花

夏日閒坐

夏日郊行

苦熱戲作

雨中遠望

日講畢同翰林張英高士奇勵杜訥看荷

初秋

中元日蕉園作

復遊盤山絕頂

春日觀花

夏日口外寄宮中

避暑暢春園雨後新月

喜雨詩十六韻

并序

南巡再過濟南

觀珍珠泉

并序

經泰山之麓

并序

再過淮南

并序

淮城曉霜聞雁

蠲江南逋賦

并序

過維揚

并序

金山江天寺

焦山

駐蹕金山

雨過錫山

虎丘望山後

鄧尉山

鄧尉小軒望太湖

登靈巖

晚過吳江

入平望

并序

禾中道上

巡幸杭州

吳山

泛舟西湖

西溪

題西溪山莊以竹牕二字書賜高士奇

過桃花嶺至玉泉寺

湖心亭

渡錢塘江

山陰

欽定四庫全書

聖祖仁皇帝御製文第二集卷四十三

古今體詩四十一首

季夏遊西山憶舊

尋芳踏綠野萬紫迷深谿地遠峰頭濶山高水勢低飛
花疑舊夢煙柳促新題沙暖鴛鴦睡萋萋草滿堤

詠花

奇蕊瓊葩綴碧枝幽香獨占美丰姿薰風初到牕前賞

疑是仙花月下移

夏日閒坐

雲斂風微紫燕飛春光已去夏初歸清襟贏得天然處
暗覺花香到玉扉

夏日郊行

節變春方去清和助麥秋蔚林乘早夏茂草接新流柳
絮堤邊起荷錢水上浮風光殊舊日此意未曾休

苦熱戲作

數年不見歎蒸熟于今熾日最難當披襟氣感三庚遠
近榻神昏九夏長煩暑時侵高閣上炎光每到小樓傍
微涼須動清風扇勉力勤民閱奏章

雨中遠望

庭槐開御幄雲氣逼遙岑雨濕鑾鈴重風吹輦路深芭
蕉分碧葉菡萏薦香林極目天邊望斜陽半嶺陰

日講畢同翰林張英高士奇勵杜訥看荷

千隊芙蓉太液池迎薰初散講筵時螭頭絕勝金蓮燭

自有清香送曉颺

初秋

大火初收暑氣殘
金風吹動芰荷寒
鳴蟬送夏聲聲急
雨霽遙天萬里看

中元日蕉園作

中元來太液新爽下林端
水檻臨流入風牕捲幔看魚
遊迷藻荇鷗戲悅沙灘
宇宙無塵翳涼生月一團

復遊盤山絕頂

絕頂巉巖裏松煙向曉開片雲生衆壑虛籟落空臺寺
古人行少林深鳥亂回千峰多秀色遠眺足徘徊

春日觀花

枝上流鶯早千紅萬紫香氣融催景麗風過遞年芳穠
李花猶淺垂楊葉未長澗中春溜發疑是奏笙簧

夏日口外寄宮中

翠蓋鸞旌出平明刻漏同油雲驅暑氣時雨引清風山
脈經年秀泉形此日克遙遙千里外回首憶深宮

避暑暢春園雨後新月

園亭氣爽雨初晴
新月朧朧透樹明
漏下微眠思治道
未知清夜意何生

喜雨詩十六韻

并序

朕撫御天下每以民生為念夙興夜寐無時少懈也
歲在丁卯自春涉夏蘊隆少雨日更增甚麥秋期至
農事堪憂傳曰龍見而雩謂建巳之月萬物始盛待
雨於天今當雨不雨或人事之未修朕躬之有過歟

亟命重臣凡國計憂戚刑名錢穀但有關於民者再三講究有言在京臣工鑄級過多皆賜復還可以致雨以及戲館秧歌之細事無不曲盡議論迄於五月憂心如焚減膳撤樂端居省過將以明詔布告天下思所以挽回天意詔下旬有餘日或膚雲方集輒阻燥風或微霖纔施旋升杲日昔人遇災而懼側身修行欲銷去之况茲不雨乎朕以涼德臨億兆之上為民之誠天日可監欲躬詣郊壇致祭諸臣亦以為請

因命禮官諏吉具儀齋戒肅穆步禱

上帝始齋之晚密雨濡潤祭之日雷雨交作自茲間日而雨徧四郊田野霑足朕先憂而飲食俱廢者為民也既雨之後喜而舉手加額者亦為民也今天不遺斯民禱而賜之雨使得不愧三公九卿之請朕之幸矣故賦喜雨詩以抒其懷

體國為民事憂勤固在斯驕陽春既盛膏澤夏愆期省刑書每下請雨令頻施雲未油然作風偏颯爾吹芄芃

苗欲槁細細草將萎翹首瞻青漢焦心對赤墀園扉重
舉滯旃厦幾疇咨齋祭祈神鑒精誠只已知誰云天最
遠於是聽能畧默處敬居日恭虔步禱時微衷慙上格
大化喜潛移霽霈滋南畝飄瀟徧九達靈黜陰陽協滂
沱渥澤垂田家還自樂朝野共吟詩從此煩襟滌由來
百志熙願同茲砥礪參贊奉無私

南巡再過濟南

六御重經歷下城頻將疾苦問蒼生肩摩轂擊風猶在

土沃農恬世久平戶戶春燈佳節過

時上元次日

邨邨社鼓

樂郊盈韶年漸布陽和澤淑氣晴光仗外橫

觀珍珠泉

并序

濟南多名泉趵突珍珠二泉為最昔經過趵突曾賦
篇什今臨珍珠泉上愛其澄澈題曰作霖

一泓清淺漾珠圓細浪潄洄小荇牽偶與諸臣閒倚檻
堪同魚藻入詩篇

經泰山之麓

并序

曩於甲子冬日登泰山之巔覽秦漢以來故蹟俯眺
寰區憑臨滄海今茲南巡復稅駕山麓因望岱宗而
展禮焉

聳巘高峰記昔攀春回瀑水響潺潺萬層石級雲霄上
千里煙邨縹緲間暫駐猶然思往事憑陵直欲小人寰
朱旗翠葆疎林外已見巍巍俯衆山

再過淮南

并序

嚮者巡省江左道出淮南軫念窮簷憫懷澤國今見

居民景象較前稍豐良慰朕懷

前來歷茲境斯民似未遂今日再經過風土覺有異紈
褐既充體廬舍各完置擁道歡趨迎扶老與攜耜咸云
獲休息近免徭役累水患日就平田疇可耕植一飲與
一食莫不歌帝賜素念切民依時為勞寤寐大造本無
私湛恩欲廣被聞言聊自寬庶慰省方意

淮城曉霜聞雁

天際晨光水月連帶霜歸雁向前川
孟城曉發寒仍在

談笑春風雜紫煙

蠲江南逋賦 并序

江南屢年逋賦二百二十餘萬逐歲帶征聞吏民頗
以為累朕志存約已弘澣衣菲食之風事期裕民師
挹彼注茲之義特頒詔令悉與蠲除

國家財賦東南重已責蠲租志念殷膏澤何妨頻見渥
普天願與樂耕耘

過維揚 并序

南巡以來減撤儀衛所歷郡邑垂髻戴白聽其趨蹌
馬首有以管籥迎者輒禁止之頃過維揚商民比屋
連艘充盈可喜但結綵張燈闐溢巷陌雖邗溝為東
南孔道歡迎亦兆庶至情猶恐前途相效勅地方長
吏諭以省費惜財并賦此詩

重過邗溝地春風細草生帆檣連賈舶笙吹滿江城物
力須教惜民情亦見誠繁華當淑景氣象喜充盈

金山江天寺

獨愛江天寺停橈上碧峰波瀾聲浩浩樓閣勢重重日
暖浮雙樹風微送午鐘遙看南北岸春色澹春容

焦山

焦山何窄寥遙與金山峙草木盡蒙茸幽偏隔城市放
舟下中流攀蘿上涯涘隱士不可招鶴銘洵足紀栖鷗
驚人飛暮雲千萬里

駐蹕金山

煙霧空濛水國昏夜移鳳舸泊山門然犀欲照鼉鼉窟

卧聽濤聲自吐吞

雨過錫山

輕雲冉冉霧彎環
細雨絲絲幕遠山
畫舫青簾開曉坐
平波漫衍白鷗閒

虎丘望山後

試劍空存石生公
尚有臺愛看山後
景錯落野田開

鄧尉山

鄧尉知名久看梅
及早春豈因耽勝
賞本是重時巡野

靄朝來散山容雨後新
續紛開萬樹相對愜佳辰

鄧尉小軒望太湖

山軒閒坐倚前楹
萬頃澄湖夕照明
夜久天心初月上
笙簧謾謾奏松聲

登靈巖

霏微靈雨散春煙
按轡逍遙陟翠巔
香水通流明若箭
琴臺列石勢如拳
諸峰盡在青蘿外
萬井全依綵仗前
聞是吳宮花草地
空餘鐘磬梵王筵

晚過吳江

垂虹蜿蜒跨長波
畫戟牙檣薄暮過
燈火千家明似畫
好風好雨祝時和

入平望

并序

平望為浙江界長吏以畫舫五百來迎恐勞民力卻之不御

錦纜無勞列綵艘
輕橈自愛倚船牕
勤民不憚周行遠
早又觀風向浙江

禾中道上

兩岸人家半種桑雨中入望盡蒼茫民間本業惟農織
愛看山邨共水鄉

巡幸杭州

東南上郡古臨安親採風謠一省觀翠岫寵旋猶舞鳳
羽旗簡約不鳴鑾春暉草木江山麗戶滿弦歌雨露寬
德化遠敷吾未信如何夾路萬聲歡

吳山

左控長江右控湖萬家煙火滿康衢偶來絕頂憑虛望
似向雲霄展畫圖

泛舟西湖

一片湖光潋灩開峰巒三面送青來輕舟櫂去波添影
曲岸移時路卻回春色初搖堤上柳惠風正發寺邊梅
此行不是探名勝欲使陽和徧九垓

西溪

十里清溪曲修篁入望深暖催梅信早水落草痕侵俗

藉漁為業園饒筍作林民風愛淳樸不厭一登臨

題西溪山莊以竹牕二字書賜高士奇

花源路幾重柴桑皆沃土煙翠竹牕幽雪香梅岸古

過桃花嶺至玉泉寺

度嶺穿雲路始平停鑣聊憇小池清游魚自有悠然意
宣識乾坤造物宏

湖心亭

水上起樓臺湖面平如鏡春風吹柳條遠與山光映

渡錢塘江

雪後春煙漠漠浮揚舸擊楫向中流江通潮汐分吳地
路入溪山隱越州振武戈矛皆駐馬

憶用武時大兵屯駐江干

省方

旂常此乘舟風帆沙鳥看何限遠近雲霞望裏收

山陰

灌木叢篁傍水幽澹煙晴日漾芳洲蘭橈搖過山陰道
在昔人傳鏡裏遊

聖祖仁皇帝御製文第二集卷四十三

欽定四庫全書

聖祖仁皇帝御製文第二集卷四十四目錄

古今體詩四十八首

謁大禹廟

登卧龍山越望亭

雲栖竹樹甚茂幽蘭滿山

虎跑泉

并序

靈隱寺

飛來峰

諭浙省將吏軍民

并序

舟中書懷

將遊華山以欲雨未往

雨中幸錫山園林

惠泉

無錫小民以羔羊惠酒爭獻御舟笑而遣之

句容雨望

巡幸江寧

賜江寧文武將士宴於教場

再過明故宮

江寧駐蹕

并序

後湖

詠幽蘭

登報恩寺浮圖

上巳日再登金山

長江夜月

曉發維揚順風揚帆午餘已過秦郵

自宿遷解纜一日夜達山東境

春晴舟中作

途次書懷

清明

憂旱憶民事作

榴花

盆景榴花高有數寸開花一朶

輓大行皇后詩四首

并序

中秋書懷

守

陵太監崔邦琪侍

慈寧宮年久詩以賜之

康熙二十八年歲旱冬又無雪朕焦心勞思寢

食俱廢二月初間謁

陵路遇大雨田野歡聲方少攄朕懷故賦五言律以記之

暢春園衆花盛開最為可觀惟綠牡丹清雅迴常世所罕有賦七言絕以記之

詠花餅

櫻桃

雨後初晴戲作二首

命裕親王福全皇長子允禔帥師征厄魯特錫

之以詩

養病塞北

古北塞上望月

康熙三十二年六月賜總督佛倫

夏燕新蓮二首

欽定四庫全書

聖祖仁皇帝御製文第二集卷四十四

古今體詩四十八首

謁大禹廟

古廟青山下登臨曉靄中
梅梁存舊跡金簡紀神功
九載隨刊力千年統緒崇
茲來薦繫藻瞻對率羣工

登臥龍山越望亭

周覽山川歷井疆
越峯突兀見青蒼
爭流萬壑通城郭

一一看來在下方

雲栖竹樹甚茂幽蘭滿山

山徑紆徐合溪聲到處聞竹深陰夏日木古勢干雲倚檻聽啼鳥攀崖採異芬韶華春已半萬物各欣欣

虎跑泉

并序

西湖自昔畫舫笙歌之地朕茲行志本省方止一覽其山川風土未曾片刻停驂尚食但飲虎跑泉水一勺耳

松林帶餘雪空山啼百舌石溜響涓涓寒泉自清潔

靈隱寺

靈山結幽秀鷲嶺起嵯峨梵宇盤空出香雲繞地多開
襟對層碧下馬撫煙蘿羽衛間來往非同問法過

飛來峰

巖岫峻嶒洞壑奇懸藤古木半迷離冷泉亭子清溪上
誰識源頭混混時

諭浙省將吏軍民并序

朕自武林回鑾百姓擁道固請暫留慰諭遣之因詔諸將吏務在調劑兵民共相輯睦息訟弭爭務本崇儉毋專末業以滋游惰并賦斯篇

省方浙西東山川極遐矚茲晨當回鑾諄諄一相勗軍民貴安和文武須聯屬息忿可無爭守分在忍辱日使訟庭閒愚民免械梏奢侈尤當懲繁華莫恣欲儉乃保其富素履各敦篤惟令教化興益見閭閻足諸吏宜勉之期歸淳樸俗

舟中書懷

澹澹春山暮靄清和風拂柳入簾輕
留情遠寄懸千里
撫景興懷歷幾程
寒盡梅中初霽雨
詩成洲上忽聞鶯
船窗睡起疑宮闕
月滿江湖聽櫓聲

將遊華山以欲雨未往

欲向青山澗壑行
春雲又變曉陰輕
勾陳不遣驚禪定
恐礙林間碧草生

雨中幸錫山園林

澹冶青山色幽探傍晚來煙籠巖下竹雨洗石邊苔斷
續聽啼鳥飄搖惜落梅曾襟原浩蕩隨意坐亭臺

惠泉

寒雲覆樹昔年經

甲子觀惠泉在十月

再品山泉到此亭春水一

犁農事足喜看膏雨徧郊垌

無錫小民以羔羊惠酒爭獻御舟笑而遣之

自昔君門隔九閭如何草野得攀援多因愛此元元切
忘分公然學負暄

句容雨望

山行逐高低四望多松樹雨裏萬人家遙看隔雲霧

巡幸江寧

南省封疆惟此區江流環繞壯規模華旗芝蓋重臨幸
二水三山半畫圖吏事莫先田野治民情但願閭閻孚
不知比歲恩波洽止聽黃童白叟呼

賜江寧文武將士宴於教場

瑞雲捧日曉初晴麗景天開羽仗明扈蹕赴桓多絳灌

分行俊譽盡璵璠三漿滿浥沾須徧五載南巡澤再傾

自甲子南巡
今已五載

文穆武恬慙化理萬方無事宴昇平

再過明故宮

樓臺金粉已沈銷不獨詩人說六朝月落宮垣春寂寂
經過惟歎草蕭蕭

江寧駐蹕

并序

江寧士民羣詣行在爭獻米穀兼羅果蔬涕泣請留
屢諭不止俯徇億兆之願勉遲信宿之行

心勤民隱獨諮諏不為江山作勝遊
白下回鑾期已近黔黎擁道欲何求
多憐野老堆盤獻勉就輿情兩日留
二十八年宵旰意豈圖遠邇慕懷柔

後湖

淼淼長湖水春來發綠波
飛鳴下鳬雁朝暮集漁蓑

詠幽蘭

婀娜花姿碧葉長風來難隱谷中香
不因紉取堪為佩縱使無人亦自芳

登報恩寺浮圖

湧地千尋起摩霄九級懸琉璃垂法相翡翠結香煙締
造人功巧流傳世代遷曠然彌遠望萬象拱諸天

上巳日再登金山

晴和逢上巳況在大江濱正是回鑾日揮毫記此辰

長江夜月

萬頃淪漣映平沙一望收天光起水色雲影共波流隔
岸姑蘇遠臨軒夜月浮民情咸自得何必泛龍舟

曉發維揚順風揚帆午餘已過秦郵

傍曉發蕪城風帆疾如駛晚照半平湖舟行百餘里

自宿遷解纜一日夜達山東境

千里南程幾日回輕舟直下沂潞洄天風更假帆檣便
一夕山東境上來

春晴舟中作

野水漫漫野岸長幾行嫩柳帶斜陽不知春色來多少
但覺飛花處處香

途次書懷

長樂

慈顏兩月違白雲迢遞戀春暉輕舟不繫兼程進應話
民風坐漏稀

清明

已日纔從江岸行舟中還復度清明上林聞道花遲發
留與歸時聽早鶯

憂旱憶民事作

仲夏炎暉盛德涼時未和驕陽因六事亢旱最三河

三河

為天下之中

民以食為重天將風更多憂勤難暇顧惟誦憫

農歌

榴花

丹誠映白日豔色喜清幽嫩綠疎櫺外開時傍翠樓

盆景榴花高有數寸開花一朵

小樹枝頭一點紅嫣然六月雜荷風攢青葉裏珊瑚朵
疑是移根金碧叢

輓大行皇后詩四首

并序

大行皇后秀鍾華閼德備壹儀溯懿親於渭陽定嘉
祥於媯汭宮闈翊贊克孝克慈頃者正位翟榆甫承
冊命遽嬰篤疾莫挽徽音時屬新秋候當闌暑驚璇
霄之月墜傷碧落之星沈物在人亡覩遺桂而雪涕
庭虛晝永經垂幕以愴懷悲從中來不能自已握管
言情聊抒痛悼

月掩椒宮歎別離傷懷始覺夜蟲悲淚添雨點千行下

此日情割秋光百慮隨雁斷衡陽聲已絕魚沈滄海信
微雨

難期繁憂莫解衷腸夢惆悵銷魂憶昔時

又

交頤淚灑夕陽紅徒把愁眉向鏡中露冷瑤階增寂寞
煙寒碧樹恨西東舊詩詠盡難回首新月生來枉照空
鸞影天涯無信息斷弦聲在未央宮

又

音容悲漸遠涕淚為誰流女德光千禩坤貞應九州涼

風銷夜燭人影散瓊樓歎此平生苦頻經無限愁

又

淅瀝動秋聲中心鬱不平離愁逢葉落別恨怨蛩鳴寂
寂瑤齋隔沈沈碧海橫玉琴哀響輟宵殿痛殘更

中秋書懷

多病多悲感百端暫來此地駐瓊鑾巖間雨歇衣還濕
嶺外雲開露未乾風激清潭三汲浪秋催隋葉五更寒
驚看圓月峰頭出似照愁腸勸夕餐

守

陵太監崔邦琪侍

慈寧宮年久詩以賜之

返照寒松影心懸泣露霜一生常感悼數載幾悲涼恨
接雲峰近思連滄海長問安勞夢想絕矣九迴腸

康熙二十八年歲旱冬又無雪朕焦心勞思寢食
俱廢二月初間謁

陵路遇大雨田野歡聲方少抒朕懷故賦五言律以記

之

念愆思雲漢望歲意真純稼穡三時重祈豐六事頻風
恬咸自樂雨灑易為春高下皆霑足方知天至仁

暢春園衆花盛開最為可觀惟綠牡丹清雅迴常
世所罕有賦七言絕以記之

碧蕊青霞壓衆芳檀心逐朵韞真香花殘又是一年事
莫遣春光放日長

詠花餅

擷取羣芳置案頭
天香一段貯清幽
人生常有悲歡事
惟爾閒情不曉愁

櫻桃

初夏含桃味早全
西山結實弱枝連
赤瑛充薦休言過
丹色濃濃衆果先

雨後初晴戲作二首

山腹重雲鎖晚煙
水光逐浪共天連
長橋疑作虹蜺似
落照扁舟湖上眠

其二

新晴雨後暎斜陽
草茂花繁處處香
石色蒼苔隨岸綠
橋邊垂柳挂絲長

命裕親王福全皇長子允禔帥師征厄魯特錫之
以詩

萬國勤懷保三階願治平
寰中皆赤子域外盡蒼生
小蠢忘併冒天心解關爭
執迷思梗化伐罪事專征
武略期無敵王師出有名
親藩分鈇鉞長子擁麾旌
驅虎賁

郎將貔貅壯禁營
玉戈凝曉色金甲耀秋晴
獲醜寧遺類籌邊重此行
據鞍軍令肅橫槊凱書成
煙火疆隅堠牛羊塞上耕
遐荒安一體歸奏慰予情

養病塞北

寒蟬鳴野樹旅雁過秋蓬
嶺外皆紅葉城邊有綠桐
身虛苦夏熱多病愛清風
山色猶然在人顏漸不同
幸無烽火事喜有智神功

古北塞上望月

桂樹清光挂碧天
雲開萬里塞無煙
遠人向背由敷政
惟在籌邊與任賢

康熙三十二年六月賜總督佛倫

東表聞風化西秦
作雨霖揚清知疾苦
激濁勉官箴
曠世孤芳節超倫
千古心封疆
資大吏撫育代憂深

夏燕新蓮

紫燕雙雙到案前
天教霖雨足禾田
臨牕斜掠蓮花影
雲與波光皆渺然

其二

丹橋綠柳轉黃鸝
碧澗深林對小池
睡起閒情題畫簞
薰風動處樂雍熙

聖祖仁皇帝御製文第二集卷四十四